









4808  
B R I E F  
DISCOVERS  
D'ESTAT,  
Au Roy.

*premiere.*

---

M. DC. XXII.

Case

F

39

.326.

162262

THE NEWBERRY  
LIBRARY



**S I R E,**  
Je ne vous veux pas faire vn long Discours,  
ny encore moins flater, tel que le sujet & la  
mode de ce temps le pourroient requérir : mais  
vn Discours naïf, tiré d'une ame franche, pure,  
fidelle, & tres-affectionnée à son Roy, & Prince  
souuerain : & ne sçay si c'est le grand zelle que  
i'ay au bien de vostre Estat & grandeur, & pro-  
sperité de vostre personne, ou quelque inspira-  
tion Diuine qui m'ont fait prendre la hardiesse  
de vous adresser ce Discours, moy qui nay esté  
nourry ny dans les escolles, ny dans les affaires  
du monde, & qui ne me suis iamais mêlé de met-  
tre la main à la plume pour affaire publique, ny  
particuliere. Je représenteray, **S I R E,** à vostre  
Majesté ce que ma capacité, le bruit commun  
& les effects qui ont paru & paroissent en vos af-  
faires me feront vous donner auis pour le bien  
de vostre seruice, & me fonderay sur le passage  
de l'Escripture sainte, qui porte que Dieu con-  
duict l'esprit & le cœur des Roys, cela se void  
clairement pratiqué en vous, **S I R E,** car depuis  
que vous auez pris le gouvernement de vostre  
Estat, vous auez fait des actes & des desseings  
qui outrepassent la capacité de vostre aage, &  
les conseils humains : c'est pourquoy vous n'estes  
& ne serez redevable des bons succez qu'à Dieu

4

seul : pource aussi qu'il se void au contraire, que Dieu ne conduict pas l'esprit, ny le cœur de tous ceux que vous employez en vos affaires, qui sont seuls cause des mal-heurs qui arriuent en icelles. La meilleure maxime que sçauroit tenir vn Roy en ses affaires : c'est de ce faire instruire du cœur, & du pouuoir de ceux dont il se sert, & qui le conseillent au gouuernement de son Estat. Il se trouuera dans vos conseils, SIRE, & au manie-  
ment de vos affaires de trois sorte de gens, plus que d'autres, sçauoir des ambitieux, des auaricieux, & des ireligieux, qui sont personnes tres-pernicieuses aupres d'un ieune Roy, comme nous auons veu par experiance en France : car toutes nos guerres ciuiles sont venuës de ces trois sortes de gens. Charles le Quint grand Empereur, & ayeul de la Royne vostre espouse, estoit vn sagace explorateur du cœur, & de la fidelité de ceux dont il se seruoit en ses plus importantes affaires, comme il est escript de luy : & entre autres finesses dont il se seruoit en cela, estoit qu'il les festinoient deux ou trois fois l'année, & les faisoit tant boire qu'ils s'enyuroient, & estant yures, il les entretenoit de ses affaires, & les faisoit entretenir par ses valets de châtre, & par ce moyen, & en l'estat qu'ils estoient, il cognoissoit leur naturel, & leur courage ; & luy



estoit aysé de les enyurer, à cause qu'ils estoient la plus-part Allemans. La Royne de Saba, dont il est tant parlé en l'Histoire sainte, fut veoir le Roy Salomon, à cause du grand bruit qui couroit par tout de sa sagesse, pour apprédre de luy à gouverner son Royaume; & entre autres preceptes qu'elle en rapporta, fut de prédre soigneusement garde aux grands, & aux Ministres de son Estat, & leur donner sujet de la craindre, & de l'aymer, par des cas extraordinaires de Justice & d'amitié. Aux ambitieux, il leur faut oster les grands charges, aux auaricieux l'intendance des finances, & aux ireligieux l'entrée de vostre Conseil. Il y a vne autre maxime pour les Roys & Princes souuerains, conexe à la precedante, qui est qu'ils se doiuent plustost seruir au gouuernement de leur Estat, d'hommes de mediocre condition, que de grands, d'autant qu'ils sont plus suceptibles de crainte & d'amitié, & qu'il est plus facile de les chastier, & s'en defaire, quand il ont failly: les moindres fautes en matiere d'Estat sont capitales, & les fautes d'Estat: comme rebellion, attantat, desobeissance, & trahison, ne touchent pas seulement le Roy, mais le peuple, à cause des troubles, & des guerres qui en naissent, la misere desquels troubles, le peuple suporte entierement: c'est pourquoy l'on

tient que de droict, le Roy ne peut pardonner  
 ses fautes. Le mépris qu'ils font en cela des loix  
 Diuines & humaines, cause aussi le mépris des  
 Roys; & en fin vn grand desordre en leur Estat.  
 Les gouuernemens des Prouinces, villes & pla-  
 ces fortes de vostre Royaume, que vous laissez  
 comme hereditaires, & en commerce, causent  
 ses desobeissances & reuoltes que nous y voyõs.  
 Si vostre Majesté en changeoit tous les ans, ou  
 tous les trois ans, les Gouverneurs, vos Roya-  
 mes n'en seroient pas tant troublez, ny vos sujets  
 si ruynez, cõme ils sont, & l'autorité de vostre  
 Majesté en demeureroit plus entiere: comme  
 aussi si vostre Majesté n'auoit point aliené la Ju-  
 stice, par le moyen de la vente des Offices, & du  
 droict Annuel, qui fait que les Cours souuerai-  
 nes ne veriffient de vos Edicts, que ce qui leur  
 plaist, & vous resistent, principalement à ce qui  
 les touche: & semble que tous ceux qui ont au-  
 iourd'huy des charges & offices ayent part à l'E-  
 stat: & sur ce, plusieurs non seulement d'entre  
 eux, mais des plus grands de vos Royaumes con-  
 niuent à la rebellion, pour s'en seruir en leurs  
 mécontentemēs, & nourrir leur ambition dans  
 les troubles, vous auez peu cognoistre, SIRE, ce-  
 la veritable depuis vostre regne. Il y a encore vn  
 autre grand mal-heur, SIRE, en l'ordre de vos

affaires, qui est, que les desseins & les conseils plus importants en sont aussi-tost cognus à tout le peuple, que conseruez, ce qui en empesche bien souuent les bons succez, l'ordre & la volonté du gouuernement des Roys ne doit point estre cognüe au peuple, que par l'execution d'iceluy, Dieu la monstre, quand il bailla la conduite du peuple d'Israël à Moysé, en ce qu'il luy donna pour la cōduite d'iceluy, la loy escripte, & la loy non escripte: la loy escripte, est la loy de la Religion, qu'il faut qu'un chacun sçache: & la loy non escripte, celle de l'Estat qu'il n'est pas besoin que le peuple sçache, n'estât donnée que pour le Souuerain: & pource les Rabins l'appellent la loy de la bouche, de sorte que la volonté d'un Roy, qu'il fait entēdre par sa bouche, doit estre obseruée cōme vne loy. Les Roys de France ont tousiours eu ce pouuoir, & ceste autorité sur tous leurs sujets, si ce n'est depuis quatre vingts ans, que les ambitieux, & les seditieux ont pris les armes, sous pretexte de Religion, pour démembler l'Estat, ou en oster tout à fait la Couronne de sur la teste des legitimes successeurs. Et de fait sur ce faux pretexte de Religion, ils y ont estably ce party de Rebelles, que vous auez aujourd'huy à combattre, SIRE, qu'il vous seroit facile de vaincre, si vostre Majesté estoit



bien seruite : mais à cause des mauuais seruiteurs,  
 & des grands ruynes que cela apportera à vos  
 autres sujets, ceux qui vous conseillent la Paix  
 ne sont pas à blasmer, ny pareillement ceux qui  
 vous cōseillent la Guerre, laquelle est tres-juste,  
 SIRE, mais la ruyne de vostre peuple, vous doit  
 toucher au cœur, & de deux maux en eslire le  
 moindre : car nulle force, ny pratique humaine  
 ne détruira ce qui est de Dieu, & ce qui n'en est  
 point viendra à neant, & perira de soy-mesme.  
 L'espere que Dieu aduancera plus vos bonnes  
 intentions, que vostre Conseil, SIRE, lequel  
 vous ne deuez pas neanmoins mépriser, princi-  
 palement celuy de la Royne vostre mere, ny son  
 assistance en iceluy : car nous auons veu qu'elle  
 s'est portée tres-vertueusemēt à la conseruation  
 de vostre Estat, apres la mort deplorable du feu  
 Roy vostre honoré & inuincible pere : elle a  
 achepté la Paix à pris d'argēt, tant qu'elle a peu,  
 & vous a marié le plustost qu'elle a peu, avec la  
 fille d'un des plus grāds Princes de la Chrestien-  
 té : elle a obligé tant qu'elle a peu par bien-faicts  
 & gratifications les plus grands de vostre Roy-  
 aume : elle a conserué les Alliances des Republi-  
 ques, & Princes estrangers : moyens tres-perti-  
 nēts pour suppléer au défaut de vostre bas aage,  
 & pour diuertir toute sorte de troubles pendant  
 iceluy

iceluy dans vos Royaumes. Mais l'ambition & l'enuie ayant charmé l'esprit & le courage d'aucuns des principaux Officiers de vostre Couronne, qu'elle auoit les plus obligez, leur firent oublier leur deuoir & la raison : En sorte qu'ils se mirent au champs, & prindrent les armes, surprirent des villes & places fortes, sous des pretexts friuoles, & sans apparence : cōtre lesquels elle se porta si valeureusement, qu'elle les auoit en fin reduits à rechercher vos bonnes graces : dequoy quelques-uns de ceux qui estoient auprès de vous, SIRE, abusant de vostre bonté, & de vostre basaage firēt leur profit à ses despens : car ce qu'ils mettoient en auant, n'estoit fondé que sur l'enuie d'un personnage, qui estoit du tout indigne d'une telle colere, à laquelle vostre Majesté fut porté par les charmes de ses enuieux, qui auoient encore plus d'ambition, & d'auarice : comme il a paru de se rendre inuincibles dans vostre Estat : & la Roync, vostre mere, qui ne scauoit à qui se fier, jettoit ce personnage dans vos affaires, pour luy ayder à supporter la charge d'icelles, sçachant que la condition d'iceluy estoit si infirme pour vostre regard, SIRE, qu'il ne pourroit monter à aucune charge, ny grandeur de biens qui peust estre prejudiciable à vostre autorité, & repos de vos sujets, laquelle

autorité & repos elle vouloit sur tout cōseruer.  
 Dieu neaumoins en a voulu disposer autrement,  
 pour esprouuer la vertu de ceste Princeſſe, qui a  
 tousiours preferé vostre contentement au ſien.  
 Et combien qu'il ny aye point de loix, ny d'occa-  
 ſions legitimes qui dispensent les Roys, non plus  
 que les autres hommes, de l'honneur qu'ils doi-  
 uent à leur mere: neaumoins elle s'est tousiours  
 ſoubs-miſe à ce qui eſtoit de vos volontez, meſ-  
 mes à celles qui vous eſtoient ſuggerées par ceux  
 qui abuſoiēt de vos bonnes graces, & a ſupporté,  
 comme chacun à veu de tres-grandes afflictions  
 pour ſa qualité, avec vne telle patience qu'il ſe  
 peut dire d'elle ſans hyperbole, qu'elle a eſté  
 plus patiente que Iob: car Iob en ſes afflictions  
 profera des parolles de cōtumelie, & blaſphemē-  
 tes contre Dieu: & elle a tousiours prié Dieu  
 pour vostre proſperité & ſanté, & les mouue-  
 ments qu'elle a faits ne prouenoient que de ce  
 qu'elle ne pouoit ſupporter les deſordres cauſez  
 par l'iniquité d'autrui, & l'abus que de gens de  
 peu faiſoient de votre bonté, & bas aage, l'eue-  
 nement en fait paroistre la vérité: car elle s'est  
 tousiours jettée entre vos bras, recognoiſſant  
 ſon innocence, & votre bonté naturelle: mais  
 maintenant, SIRE, que vous eſtes en bonne  
 vnion avec elle, votre Maieſté proſperera enco-



re plus, & se confiant du tout en elle, cela osterà les enuies, & des mécontentemens qui causent des troubles ordinairement dans vostre Royau-  
me, vous aurez en elle vn assuré cōfidant, com-  
me estant interessée au bien de vostre Estat, &  
prosperité de vostre personne : Et en fin vostre  
Majesté fera, par son bon naturel, que les faux  
ombrages qu'on vous en a donné redonderont  
sur la teste des Autheurs d'iceux, à leur cōfusion  
& ruyne : car Dieu benira ceste vnion de telle  
sorte que vous ne serez plus entrepris d'aucuns  
charmés, cela vous ostoit, SIRE, les fonctions  
naturelles de vostre bonté & Iustice ; & si Dieu  
ne vous en eust depetré, il en fut arriué de grāds  
troubles en vos Royaumes : car leur ambition  
estoit si grande qu'elle passoit par dessus toutes  
les autres qui s'estoient esleuées en vos Estats,  
chose qui se voyoit clairement, en ce qu'ils  
estoint insatiables de Gouuernemens, d'Estats  
& de Finances. Et à la mienne volonté, SIRE,  
que ceux qui abusent de vostre faueur & amitié,  
à demander des charges & dons immenses, con-  
siderassent ce qui s'est tousiours pratiqué en  
France, de repeter ce qu'on auoit excessiuemēt  
pris des Roys : comme il appert par les Ordon-  
nances des Roys, Charles VI. Philippes VI. Iean  
II. Charles V. & VIII. par lesquelles sont reuo-

quées telles alienations : & en l'assemblée des Estats tenus à Tours, present ledit Charles VIII. furent rescindées plusieurs alienations faites par Louys XI. ou l'on osta à Tanored du Chastel, son grãd mignon, plusieurs places qu'il luy auoit données : cela fut pareillement renouuellé aux derniers Estats tenus à Orleans, delà sont nées les Apostilles de la Chambre des Comptes, trop donné soit repeté : Ce qu'aussi Basille, Empereur de Constantinople, ordonna par Edict, que ceux qui auoient pris argent sans raison, & dons immenses de l'Empereur Michel son predecesseur le rendroient. Vous avez vn grand fonds en cela, SIRE, & sur ceux qui ont manié, & manient vos Finances : lesquels y cōmettent de si grands larcins, qu'vn d'entre-eux n'a pas esté honteux de donner cinq cens mil liures en mariage à vne de ses filles, qui est vne chose monstrueuse, attendu que cela passe l'ordre de la nature. Le Roy d'Espagne, à present regnant, ayant eu aduis des maluerſations faites aux Finances, durant le regne du Roy son père, n'a pas tant demeuré que vous, SIRE, a en faire faire vne recherche exacte, dont il a tiré avec douceur & iustice vn grãd nombre de deniers, ce sont les principaux nerfs d'vn Estat, & de la grandeur d'vn Roy, & la plus brillante perle de vostre Cabinet, SIRE, la va-

leur de laquelle vos predecesseurs Roys n'ont  
 iamais cogneuë, ny encore vous, car elle croist  
 tousiours de pris, & ny a Monarque en la Chre-  
 stienté qui en aye de si grand valeur : mais vos  
 Officiers la ternissent, & ne la font éclater qu'en  
 leur luxe, lequel est si grand, non seulement en-  
 tre ceux de vos Finances, ains entre tous ceux  
 de la Iustice, que pour y subuenir, il se trouuera  
 que tous ensemble prennent plus sur vos autres  
 sujets, que vous, delà sont si grand nombre, &  
 font iouïr des resorts si especiaux en apparence  
 parmy le peuple, qu'il leur seroit ayse de fournir  
 vne Republique dans vne Monarchie, si vostre  
 Majesté ny fait tenir autre ordre par vne autre  
 guerre contre eux, aussi juste & necessaire pour  
 le bien de vostre Estat, que celle des Rebelles de  
 la pretenduë Religion : Il ny aura pas tant d'efu-  
 sion de sang, ny aucune perte de Noblesse, & si la  
 gloire n'en sera pas moindre d'abattre tant de  
 monstres, que l'ambition & l'auarice ont esleuez  
 dans vos Royaumes d'aussi long temps : Dieu  
 vous y portera, comme il fait à celle contre les  
 Rebelles pour sa gloire & soulagement de vos  
 pauures sujets, qui sont tellement exigez par les  
 gens de guerre & par vos officiers, qu'il ne leur  
 reste que du pain & de l'eau pour se sustanter, &  
 la plus-part succombent par leur pauureté en la



culture de vos mines d'or & d'argent, que vostre Majesté a par leur labeur. Les Docteurs d'Estat Machiauelistes de ce temps publient vne maxime tres-pernitiouse à tous Roys & Princes Chrestiens, de dire qu'il faut tenir leurs sujets pauvres: il ny a rien qui face plustost murmurer & reuolter le peuple que l'oppression de la pauvreté & nécessité: cela ce void en l'Histoire sainte du peuple d'Israël, qui à la moindre nécessité qu'ils auoient, ils murmuroient contre Dieu, & leurs conducteurs: d'ailleurs les grands & ambitieux d'un Royaume se seruēt de la pauvreté du peuple pour les faire reuolter: la maxime est plus certaine, que la richesse du peuple est le tresor & forteresse des bons Roys: & c'est vne autre perle de vostre Cabinet, SIRE, que vostre peuple, la multitude & generosité duquel surpasse toutes les autres nations: Et la troisieme perle est celle de la Religion Catholique Apostolique & Romaine, que Dieu a donnée à vos predecesseurs Roys par preuētion de grace, & l'ont si biē receuë & dotée qu'ils en ont acquis le titre de tres-Chrestiens, à l'exclusion de tous autres Roys: En ces trois perles, SIRE, bien conseruées, consiste vostre grandeur, & de vostre Estat, vous les ferez briller par dessus toutes les nations de la terre, si vostre Majesté n'est point

diuertie par le cōseil des ambitieux, auaricieux,  
 & ireligieux qui fleurent à vostre aurreille, & en  
 vostre Conseil, Vous trouuerez, SIRE, encore  
 des gens de bien dans vostre Royaume, qui vous  
 dechiffreront fidelement les vertus de ces trois  
 Perles, qui vous rendront inuincibles. Et com-  
 me le feu Roy, vostre tres-honoré pere, s'aquit  
 vne puissante gloire par la dissipation & ruyne  
 du party des rebelles Ligueurs, vostre Majesté  
 ne l'acquerra pas moindre d'abatre le party des  
 rebelles de la Pretendue Religion reformée, sans  
 leur oster la liberté de Conscience, remettant  
 cela en Dieu, qui les inspirera de se recognoistre,  
 pour l'augmentation de sa gloire, & de la vostre.

**F I N.**











